

JAMHURI YA MUUNGANO WA TANZANIA

BUNGE LA TANZANIA



ORODHA YA SHUGHULI ZA LEO

MKUTANO WA KUMI NA TANO

KIKAO CHA TANO

08 APRILI, 2019



ORODHA YA SHUGHULI ZA LEO

MKUTANO WA KUMI NA TANO

KIKAO CHA TANO – TAREHE 08 APRILI, 2019

I. DUA:

II. HATI ZA KUWASILISHA MEZANI:

WAZIRI WA MAJI:

Taarifa ya Mwaka ya Mamlaka ya Udhhibiti wa Huduma za Nishati na Maji kwa Mwaka ulioishia tarehe 30 Juni, 2018 (*The Annual Report of the Energy and Water Utilities Regulatory Authority for the year ended 30th June, 2018*).

III. MASWALI:

OFISI YA RAIS (TAMISEMI):

33. MHESHIMIWA DKT. DALALY PETER KAFUMU (IGUNGA):

Atamuuliza Mheshimiwa Waziri wa Nchi, Ofisi ya Rais (TAMISEMI):- Katika Ilani ya CCM kuhusu huduma za Afya nchini ni kujenga Zahanati katika Vijiji na Kituo cha Afya katika kila Kata; kwa sasa Jimbo la Igunga lina Vituo vya Afya viwili tu katika Kata 2 kati ya 17 na Zahanati kwenye Vijiji 19 tu kati ya Vijiji 68:-

(a) Je, ni lini Serikali itajenga Vituo vya Afya kwenye Kata 15 zilizosalia;

(b) Je, ni lini Serikali itajenga Zahanati kwenye Vijiji 49 vilivyosalia.

34. MHESHIMIWA LAMECK OKAMBO AIRO (RORYA):

Atamuuliza Mheshimiwa Waziri Wa Nchi, Ofisi ya Rais (TAMISEMI):- Wakati wa ziara ya Kampeni za Uchaguzi Mheshimiwa Rais aliahidi kujenga daraja la kuunganisha Tarafa tatu za Luoimbo, Suba na Nyancha na tayari Halmashauri imeshapeleka makadirio Wizarani:-

Je, ni lini Serikali itatenga fedha kwa ajili ya ujenzi wa daraja hilo.

**35. MHESHIMIWA ZAYNAB MATITU VULLU
(VITI MAALUM):**

Atamuuliza Mheshimiwa Waziri wa Nchi, Ofisi ya Rais (TAMISEMI):- Barabara ya Vikindu – Vianzi hadi Sangatini ni muhimu kwa wakazi wa Jimbo la Mkuranga na Kigamboni.

Je, ni lini barabara hiyo itajengwa kwa kiwango cha lami.

OFISI YA MAKAMU WA RAIS (MUUNGANO NA MAZINGIRA):

**36. MHESHIMIWA FAKHARIA SHOMAR KHAMIS
(VITI MAALUM):**

Atamuuliza Mheshimiwa Waziri wa Nchi, Ofisi ya Makamu wa Rais (Muungano na Mazingira):- Moja kati ya Majukumu ya kuimarisha Muungano ni pamoja na kuhakikisha kuwa kero zote za Muungano zinatatuliwa; na Vikao vingi vimekaa na kujadili kero hizo:-

Je, ni kero ngapi tayari zimetatuliwa na zipi ambazo hadi sasa zimeshindikana kupatiwa ufumbuzi.

**37. MHESHIMIWA MAGDALENA HAMIS SAKAYA
(KALIUA):**

Atamuuliza Mheshimiwa Waziri wa Nchi, Ofisi ya Makamu wa Rais (Muungano na Mazingira):- Matumizi ya mifuko ya plastiki hapa nchini yamekuwa na athari kubwa kwenye uharibifu wa mazingira na uchafuzi wa Miji yetu:-

Je, Serikali ina mikakati gani ya kuondoa matumizi ya plastiki hapa Nchini.

**WIZARA YA ARDHI, NYUMBA NA MAENDELEO
YA MAKAZI:**

**38. MHESHIMIWA BUPE NELSON
MWAKANG'ATA (VITI MAALUM):**

Atamuuliza Mheshimiwa Waziri wa Ardhi, Nyumba na Maendeleo ya Makazi:-

Je, ni lini Serikali itamaliza mgogoro wa shamba la EFATHA Mkoani Rukwa.

**39. MHESHIMIWA RHODA EDWARD KUNCHELA
(VITI MAALUM):**

Atamuuliza Mheshimiwa Waziri wa Ardhi, Nyumba na Maendeleo ya Makazi:- Serikali iliahidi kumaliza migogoro ya ardhi kwa kupima maeneo ya Wananchi mapema ili kuepuka bomoa bomoa bila fidia:-

Je, ni lini jambo hilo litafikia mwisho.

WIZARA YA MAJI:

**40. MHESHIMIWA JOHN JOHN MNYIKA
(KIBAMBA):**

- Atamuuliza Mheshimiwa Waziri wa Maji:- Tarehe 4 Februari Serikali ikijibu hoja binafsi kuhusu upatikanaji wa maji iliahidi kuwa ifikapo mwaka 2016 matatizo ya maji yangekuwa yamemalizika katika Jiji la Dar es Salaam:-

(a) Je, ni kwanini ahadi hiyo haijatekelezwa kwa wakati;

(b) Je, ni Mitaa ipi katika Jimbo la Kibamba maji hayatoki na ni lini DAWASA itahakikisha maji yanatoka katika maeneo hayo;

(c) Je, Serikali iko tayari kuwasilisha katika kila Mkutano wa Bunge Taarifa ya utekelezaji wa

miradi ya maji nchini kama ilivyokubali katika Bunge la Kumi.

WIZARA YA NISHATI:

41. MHESHIMIWA PROF. NORMAN ADAMSON SIGALLA (MAKETE):

Atamuuliza Mheshimiwa Waziri wa Nishati:-
Kumekuwa na maandalizi ya kuzalisha umeme katika Mto Lumakali uliopo Balogwa Makete na ni miaka Kumi na Moja sasa Wananchi wanaendelea kusubiri ambapo mwaka 2015/2016 Serikali ilitoa kauli kwamba ujenzi huo ungeanza mwaka 2017:-

Je, ni lini Serikali itaanza kujenga bwawa hilo kwa ajili ya kuzalisha umeme.

42. MHESHIMIWA PAULINE PHILIP GEKUL (BABATI MJINI):

Atamuuliza Mheshimiwa Waziri wa Nishati:-

Je, ni lini Wananchi wanaodai fidia ya maeneo yao yaliyopitiwa na mradi wa umeme wa KV 400 katika Jimbo la Babati Mjini watalipwa.

IV. HOJA ZA SERIKALI:

WAZIRI MKUU:

Kwamba, Bunge sasa likubali kupitisha Makadirio ya Mapato na Matumizi ya Ofisi ya Waziri Mkuu kwa Mwaka wa Fedha 2019/2020.

(Majadiliano yanaendelea)

**DODOMA
08 APRILI, 2019**



**S. KAGAIGAI
KATIBU WA BUNGE**